

आकाशवाणी

खबरां विजय बजाज कोला

1. प्रधानमंत्री नरेन्द्र मोदी कल उत्तर प्रदेश दे वाराणसी च 2 जहार 200 करोड़ रुपें दिएं विकास परियोजनाएं दा शुभारम्भ ते नीह पत्थर बी रक्खडन।
2. भारती चुनांस आयोग अज्ज बिहार च मतदाता सूचिएं दी बशेश नजरसानी आहली प्रक्रिया दे तैहत तैयार कीती गेदी मतदाता सूची दा मसौदा जारी करोग।
3. बैंकिंग कानून संशोधन अधिनियम 2025 दे मुख प्रावधान अज्जै थमां लागू होई गे न। इस कानून दा मकसद बैंकिंग खेतर च प्रशासन मानकें च सुधार ते निवेशकें ते जमाकर्ताएं दी मती सुरक्षा जकीनी बनाना ऐ।
4. केन्द्री संचार मंत्री ज्योतिरादित्य सिंधिया होरें आखेआ ऐ जे एलन मस्क हुंदी कंपनी स्टारलिक गी भारत च उपग्रैह इंटरनेट सेवा शुरु करने लेई लसेंस देई दिता गेआ ऐ।
5. मौसम विभाग नै मुख भरै च सामान्य थमां मती बरखा बरने दा अंदाजा जताया ऐ। एह लम्मी अवधि दी औसत बरखा थमां 106 फीसद बद्ध ऐ।

6. ते क्रिकेट च लंदन दे केनिंगटन ओवल च इंग्लैंड दे कन्नै 5में ते अखीरले टेस्ट मैच दे कल पैहले ध्याड़े भारत नै करुण नायर दे महत्वपूर्ण अर्द्धशतक दी बढौलत 6 विकेटें पर 204 द्रौड़ां बनाई लैतियां न।

<><><><><><>

### PM-Varanasi

प्रधानमंत्री नरेन्द्र मोदी कल उत्तर प्रदेश दे वाराणसी च 2 जहार 200 करोड़ रुपें दिएं विकास परियोजनाएं दा शुभारम्भ ते नीह पत्थर बी रक्खडन। प्रधानमंत्री होर कल किसान सम्मान निधि योजना दी 20मीं किश्त दे तैहत 9 करोड़ 70 लक्ख रुपें शा मते करसानें गी 20 जहार 500 करोड़ रुपे जारी करडन। वाराणसी च श्री मोदी होर वाराणसी-भदोही मार्ग ते चितोनी-शूल टंकेश्वर मार्ग गी चैड़ा करने दे कम्मै दा शुभारम्भ करडन ते हरदत्तनपुर च रेलवे ओवरब्रिज दा उदघाटन करडन। सैलसफा खेतर गी बढावा देने लेई श्री मोदी होर रीवरफ्रंट आहले 8 कच्चे घाटें दे पुननिर्माण सने कालिकाधाम च विकास कम्में ते दुर्गाकुण्डी च जलशुद्धि कम्म दा बी शुभारम्भ करडन। ओह, लमही च महान उपन्यासकार मुंशी प्रेमचंद हुं'दे जद्दी घरै दे परतिये विकास ते अजैबघर दे रूप च ओहदे निर्माण कम्मै गी बी शुरू करोआडन। प्रधानमंत्री होर ग्रामीण इलाकें च पीने आहली साफ पानी दी सुविधा जकीनी बनाने लेई जल-जीवन मिशन दे तैहत 47 ग्रामीण पेयजल योजनाएं दा बी शुभारम्भ करडन। एहदे अलावा ओह पंप्पित मदन मोहन मालवीय कैंसर केन्द्र ते होमीभाभा कैंसर अस्पताल च

रोबोटिक्स सर्जरी ते सी.टी. स्कैन केन्द्र सने उन्नत चिकित्सा उपकरण प्रतिष्ठानें दा उद्घाटन करडन। ओह होम्योपैथिक कॉलेज ते अस्पताल दा नीह पत्थर बी रक्खडन। प्रधानमंत्री मोदी डॉक्टर भीमराव आम्बेकर स्पोर्ट्स स्टेडियम च सिंथेटिक हॉकी टर्फ दा उद्घाटन करडन। एहदे अलावा उंदा दिव्यांग ते बुजुर्ग लोकें गी 7 जहार 400 शा मते सैहयोगी उपकरण बंडूने दा बी कार्यक्रम ऐ।

<><><><><><>

EC-Bihar

चुनास आयोग अज्ज बिहार च बशेष नजरसानी आहली पैहल दे तैहत तैयार मतदाता सूची दा मसौदा जारी करोग। मसौदा जारी करने शा पैहले मुख्क चुनास आयुक्त जानेश कुमार होरें आखेआ जे एह मतदाता सूची भौतिक ते डिजिटल रूप च राज्य दे सब्भनें 38 जिलें च सब्भनें मान्यता आहलें राजनीतिक दलें गी उपलब्ध करोआई जाग। उनें दस्सेआ जे बिहार दे मुख्क चुनास अधिकारी ते 243 चुनास अधिकारी मतदाता जां कुसै बी मान्यता आहले राजनीतिक दलें गी सूची च कुसै बी गलती दे बारें च आपत्ति दर्ज कराने दा मौका देडन। अज्ज कोला लेइयै 1 सितंबर तगर आपत्ति दर्ज करोआई जाई सकदियां न।

<><><><><><>

EC-EVM

भारती चुनांs आयोग नै फही एह स्पष्ट कीता ऐ जे इलेक्ट्रॉनिक वोटिंग मशीनें कन्नै कुसै किस्मै दी कोई छेड़छाड़ मुमकन नई ऐ। आयोग नै आखेआ जे पिच्छले बरै महाराष्ट्र विधानसभा चुनां दे दरान मतदाताएं दी तसदीक आहली पर्चियें दी गिनतरी च कोई फर्कोफर्की नई पाई गई। आयोग नै आखेआ जे 10 मेदवारें थमां हासल आवेदनें दी बिनाह उप्पर 10 विधानसभा खेतरें च इलेक्ट्रॉनिक वोटिंग मशीनें दी जांच कीती गई ही ते सब्भै मशीनां दुरूस्त पाइयां गइयां हि' आं। चुनांs हारने आहले 8 मेदवारें दी मजूदगी च 10 विधानसभा खेतरें च 48 बैलट यूनिट, 31 कंट्रोल यूनिट ते मतदाताएं दी तसदीक आहिलियें 31 पर्ची मशीनें दी बी जांच कीती गई ते इ' नैगी दुरूस्त पाया गेआ।

<><><><><><>

### Banking Laws Amendment Act

बैंकिंग खेतर प्रशासन च सुधार ते निवेशक ते जमाकर्ताएं दी सुरक्षा सुनिश्चित करने आस्तै बैंकिंग कन्नू संशोधन अधिनियम 2025 अज्जै कोला प्रभावी होई गेआ ऐ। वित्त मंत्रालय नै दस्सेआ जे इस बरै 15 अप्रैल गी अधिसूचित अधिनियम दा मकसद सार्वजनिक खेतर दे बैंके गी आण्टि गुणवत्ता च सुधार ते सहकारी बैंके च अध्यक्ष ते पूर्णकालिक निदेशके गी छोड़ियै निदेशके दा कार्यकाल बढ़ाना ऐ। अधिनियम दे प्रावधान बद्दोबद्द ब्याज दी सीमा च बी संशोधन करडन ते इसी 5 लक्ख रपे कोला बढ़ाइयै 2 करोड़ रपे तगर करडन। बरै 1968 दे परैत इसी सीमा च कोई बी संशोधन नई होआ ऐ।

<><><><><><>

## Scindia-Musk

केंद्री संचार मंत्री ज्योतिरादित्य सिंधिया होरें आखेआ ऐ जे एलन मस्क दी कंपनी स्टारलिक गी भारत च उपग्रह इंटरनेट सेवा शुरू करने आस्तै लसेंस दिता गोआ ऐ। उनें दस्सेआ जे स्पेक्ट्रम आवंटन दी रूप-रेखा बी तैयार करी लैती गेदी ऐ। नमी दिल्ली च मोबाइल टेलीफोनी दे 30 बरें पूरे होने पर आयोजित मोबाइल कान्क्लेव गी संबोधित करदे होई श्री सिंधिया होरें आखेआ जे पिछले 11 बरें दरान भारत दा डिजिटल सफर बेहतरीन रेआ ऐ। उनें आखेआ जे पिछले दस बरें च देश दी डिजिटल पुज्ज महानगरें शा लेइयै दूर-दूरे दे ग्राएं तगर होई गई ऐ। एहदे कन्नै बसनीके दे सशक्तिकरण दे कन्नो-कन्नी भारत सस्ती ते समावेशी तकनीक च विश्व च अगुआ बनी गोआ ऐ।

<><><><><><>

## US-Tarrif Mexico

अमरीका दे राष्ट्रपति ट्रम्प होरें मैक्सिको गी 30 फीसद आयात शुल्क थमां बचने पर बचार लेई 90 दिनें दा समें दिता ऐ। मैक्सिको थमां गैर ऑटोमोबाईल ते गैर धातु चीजे दे आयात पर 30 फीसद शुल्क लाया गोआ ऐ। राष्ट्रपति ट्रम्प ते मैक्सिको दे राष्ट्रपति क्लाउडिया शिनबॉम हुं दे मझाटै गल्लबात दे मगरा सोशल मीडिया पोस्ट पर इस समें विस्तार दा ऐलान कीता गोआ। मैक्सिको दा लगभग 85 फीसद निर्यात अमरीका-मैक्सिको-कनाडा

समझौता नियमें दे तैहत हुंदा ऐ। हालांकि राष्ट्रपति ट्रम्प होरें आखेआ जे मैक्सिको थमां फौलाद, एल्मूनियम ते तांबे दे आयात पर 50 फीसद ते ऑटोमोबाइल समेयान दे आयात पर 25 फीसद शुल्क जारी रौहग जेहड़ा इस समझौते दे तैहत नेई ऐ।

<><><><><><>

### IMD-Rains

मौसम विभाग नै मुख्य भरै च सामान्य थमां मती बरखा बरने दा अंदाजा जताया ऐ। एह लम्मी अवधि दी औसत बरखा थमां 106 फीसद बद्ध ऐ। मौसम विभाग दे महानिदेशक एम. महापात्र होरें दस्सेआ जे दक्खन-पच्छम मानसून च अगस्त थमां सितंबर तोहड़ी देशै दे मते सारे हिस्सें च सामान्य थमां मती बरखा बरने दी मेद ऐ। पूर्वोत्तर ते आले-दोआले दे पूर्वी इलाकें सने मध्य भारत दे किश बक्ख-बक्ख हिस्सें ते प्रायद्वीप आहले खेतर दे दक्खन-पच्छमी हिस्सें च सामान्य कोला घट्ट बरखा बरने दी संभावना ऐ। मौसम विभाग नै ब्लॉक-स्तर पर बरखा दी निगरानी शुरू करने दा ऐलान कीता ऐ। श्री महापात्र होरें दस्सेआ जे मौसम विभाग जिला-स्तर पर बरखा सरबंधी आंकड़े दे कन्नो-कन्नी हून ब्लॉक-स्तर पर बरखा दी निगरानी मतल्लक आंकड़े बी उपलब्ध करोआग।

<><><><><><>

Cricket

लंदन दे केनिंगटन ओवल च इंग्लैंड दे कन्ने 5में ते अखीरले टेस्ट मैच दे कल पैहले ध्याड़े भारत नै 6 विकेटें पर 204 द्रौड़ां बनाई लैतियां न। करुण नायर नै महत्वपूर्ण अर्द्धशतक लाया। 2016 च इंग्लैंड खलाफ अपने मशहूर तेहे शतक दे बाद देशै थमां बाह एह नायर हुंदा पैहला अर्द्धशतक ऐ। सांई सुदर्शन नै 38 द्रौड़ां बनाइयां जिसलै के वॉशिंगटन सुंदर 19 द्रौड़ां बनाइयै क्रीज़ पर न। नायर ते सुंदर नै 88 गेंदें च 51 द्रौड़ें दी सांझेदारी कीती। अज्ज ओह दुए ध्याड़े बल्लेबाजी जारी रक्खडन। इंग्लैंड दे गस-एटकिंसन ते जोश टंग नै 2-2 विकटां लैतियां। बरखा करी खेड़ द'उं बारी रोकना बी पेआ पर मगरा बधाए गेदे समें दे चलदे कुल 64 ओवरें दा खेड़ पूरे दिनै च होआ। एहदे शा पैहले इंग्लैंड नै टॉस जित्तियै गेंदबाजी करने दा फैसला कीता। इंग्लैंड 5 टेस्ट मैचें दी इस श्रृंखला च 2-1 कन्ने अगगे ऐ।

<><><><><><>

### U 17 World Wrestling Championship

भारती महिला पलोआनें कल एथेंस च अंर-17 विश्व कुश्ती चैम्पियनशिप च सुन्ने दे 2, चांदी दे 2 ते कैह दे 1 तगमे सने कुल 5 तगमे जिते न। महिलाएं दी 43 किलोग्राम फ्रीस्टाइल च भारत दी रचना नै चीन दी शिन हुआंग गी 3-0 कन्ने हराइयै पैहला सुन्ने दा तगमा जितेआ। एहदे तुरत मगरा, भारत दी गै अश्विनी बिश्नोई होरें 65 किलोग्राम भार वर्ग च उज़्बेकिस्तान दी मुख्य्यो राखिम जोनोवा गी 3-0 कन्ने हराइयै इक होर सुन्ने

दा तगमा जित्तेआ। 57 किलोग्राम भार वर्ग च, मोनी नै चांदी दा तगमा जित्तेआ। भारत लेई चांदी दा दुआ तगमा काजल नै 73 किलोग्राम भार वर्ग च हासल कीता। एहदे अलावा 49 किलोग्राम भार वर्ग च कोमल वर्मा नै यूनाइटेड वर्ल्ड रेसलिंग दी एनहेलिना बुर्किना गी 8-3 कन्नै हराइयै कैह दा तगमा अपने नांस कीता।

<><><><><><>